

松

陵

文

獻

松陵文獻

獻集卷十五

邑人潘樞章力田撰

官師志三

明

劉時俊

劉時俊字恒甫富順人萬曆二十六年進士知廬江
改知桐城二十九年又徙吳江爲人豁達精敏往催
科者率以盈爲辦然黠者善負奸胥復陰與媾卽匿
其賦可不輸一錢而馴者至有十限三分之輸時俊

一以八分有五爲程黠者無所白匿蓋實得戶部考成之數賦之入也溢於舊郡邑吏素表裏爲奸下檄督逋實飽私橐時俊覺之檄下卽并經承解上奸遂阻漕卒獷悍橫索無厭時俊請漕撫約束每百石加四石凡概量之事率耆老爲政軍第持籌而已有浮圭合者扶以徇每倉設一門者按衛給籤驗而入毋多納一人曰吾不束軍而束民歲省米二萬石運塘歲苦圯時俊始甃以巨石延袤八十里費鉅萬而民間不知有役爲邑永利尤重教化表章節義賓禮耆

碩每望後一日角巾緩帶從容入學宮與諸生質疑問難竟日而罷月以爲常見訟牒有婦人名卽除之或婦人以事至戒伍伯離丈餘性公正不可干以私或以至情告輒色動常作續情說以導民厚焉久之事愈省訟愈減盜賊屏跡捕役患之遠結龍游盜夜半潛入城劫質庫計挫其威時俊聞之卽率吏卒臨視拘捕役家屬責以三日內必獲果如期獲悉以其贓歸質庫及賞諸捕他無所問會稅監陳增橫甚其黨教令檄蘇郡云昨歲金閫之變失上供物某某掠

某某匿凡五十三人皆吳江巨室知府錯愕不能應
時俊駁之曰按檄事且經年昔不聞一言今驟發何
也稅監固在徐入京之路乃來吳耶捕其黨置之法
人皆爲時俊危時俊曰巨室邑命脉也一網五十三
人邑空矣吾寧以身當之增見爰書語塞竟無以加
時俊亦卒不言五十三人名以市德此尤其難者三
十五年以治行最遷南京兵部主事選爲南京兵科
給事中又二年出爲福建僉事以計典謫湖廣按察
知事久之再遷南京尚寶司丞天啓元年引疾會蜀

師起以太僕少卿贊畫軍中坐蜚語被逮放歸後事
白論平蜀功贈太僕寺卿溫璜紀事曰吳民健訟往
往以人命求勝時俊每鞫問必召一二證者與約曰
第許言一字不得言二字一字謂真與假也證者稍
有游移卽重杖之故冤皆立雪而刁風稍息

馮任

馮任字重夫慈谿人萬曆三十五年進士知吳江邑
多奸弊任悉意爬梳之得隱占田三百餘頃侵沒稅
糧四千餘金其明年大水請蠲征發賑條救荒十二

便宜行之多所全濟然竟以催科缺額奪奉秩滿遷工部主事累進郎中出知成都府天啓元年遷陝西副使莊浪兵備三年轉叅政駐涼州是冬有邊寇遣將李成功禦之斬獲甚衆明年春寇復大入親率師赴之三戰三捷俘斬數百尋以父病請告崇禎初補山東叅政武德兵備二年冬率師入援京師比至圍解以功遷廣東按察使而山東撫臣因皮島之變請畱爲登萊道許之累遷左布政天津兵備時景德間盜起鐵脰賊賈邦槐等尤橫輸輓幾斷任移鎮泊頭

四月焚其巢購得賊首斬之在天津二年上知其才
密疏姓名於御屏七年遂擢副都御史巡撫山永築
南北翼兩城進焚鹽屯俘斬頗衆展東勝城九百餘
丈據其險阨九年敵兵入塞將反攻關門任遣將設
伏於七家嶺以火攻之殺精銳三千餘人遂逡巡遁
去明年築關西土城七十餘丈關東歡喜嶺敵臺一
又傍牆立墩臺六先是撫山永者爲武陵楊嗣昌方
當國兼本兵柄任在關修舉廢墜一切反其行事嗣
昌聞之弗善也又議減關兵任具陳利害力爭得止

遂連疏引病不許十二年嗣昌密疏劾之坐免任在
關門三年適有天幸敵未嘗犯其境去未幾而代者
或殞或刑後遂議撤關以外棄之矣晚自號拙存居
士曰人皆以巧敗我獨以拙存後三年卒任居官勤
恪其在吳江值大水爲虐任斤斤守文而已不能行
度外之恩時譽遠出時俊下然於吏事亦無所廢云
霍維華

霍維華字應庚東光人萬曆四十一年進士知金壇
縣又三年調吳江甫至卽議興革大計以田賦莫重

於吳江計正賦若兵若役若徭若新增之餉蓋每畝
四斗有奇而耗不與焉且湖濱浮淤滄桑遞變等則
尤繁莫可究詰有腴而賦輕有瘠而賦重有無賦之
田有無田之賦每扼腕太息與邑中賢士大夫考究
源委維華有心計人不能欺周行阡陌暴露寒暑晝
則清丈夜則持籌肥磽廣狹瞭如指掌匿田隱賦纖
悉具出於是塌者蠲瘠者減而通計所贏均之合邑
向之所輸四斗者減一升五合有奇而分則三十八
者酌定爲九條列十有八議皆經久碩畫凡期年而

竣事計畝則百姓受減豁之利計糧則國家無絲毫之虧其所定履畝冊至今遵守不敢易焉他若催科兌運汰冗釐奸皆可爲後人法佐貳吏卒無所事事至懟尸無聊而士民望之如神明論者以比劉時俊稱曰劉霍四十六年入覲留部天啓元年授兵科給事中出爲陝西僉事四年復入刑科未幾驟遷至兵部尚書以附奄敗然其治邑之功固不可泯也

晏清

晏清字泰徵黃岡人萬曆四十七年進士知蕪湖天

啓元年調吳江蕪湖人爭之不能得性和易聽訟但求情實不尚威嚴事至立決請囑不行有二三大猾鰥閭左者清捕得杖之縱民環觀械繫而出衆共手擊之竟日而斃遠近快焉催科有序亦無逋者四年大水清角巾單舸出入洪濤間安輯遺黎與耆老講求丁亥戊申故事謂今昔異時請蠲請賑勢必不能惟漕運改折可稍救粟貴之苦爲白兩臺以去就爭遂以首災上聞得盡折歲額官所免加耗幾五萬石民所省加贈又不下四萬石而折價輕於市價亦不

下四萬金朝廷固以此爲不蠲之蠲不賑之賑而反
覆抗論得請者清之力也巡撫周起元發符買米縣
各數萬石他縣多貧富戶大爲民擾獨清知湖漕富
戶以子母貸商者召語以故給之符聽其買賣不旬
月而米至商民兩便明年擢禮部主事尋改吏部七
年以忤閹罷爲民崇禎改元復起吏部累進郎中十
六年遷廣東副使水利道後爲吏部尚書

熊開元

熊開元字玄年嘉魚人天啓五年進士知崇明縣俗

頑獷有白棒手數十輩橫甚前令以譁去署事主簿復爲所擊開元設方略盡得其魁置之法而釋餘黨不問一境帖然邑田土坍漲不常爲釐正稅額凡數百頃以餘糧三千石請抵遼餉減編九百餘金崇禎元年調吳江故事官署供帳悉出庫吏因得緣爲奸利開元命悉出賣還官著令革諸進奉而慎擇筦庫出納有程無敢犯法者以糧運南輕於北定爲例使輕重相均勢家以軍儲請者一以故事裁之無所偏徇所清覈隱田以萬計米以千計上臺稱其廉明先

是漕卒橫甚小不遂卽譁譟隨之卽前令劉公時俊等不能禁也開元密請上臺假便宜約束之嘗戴星唱籌聲明畢兌所省耗餘十五故事行糧萬金縣官例有扣剋開元曰是致譁之端也如數畀之運弁來謁或請少示裁抑開元隆禮有加且致餽焉欽定鐵斛用椒實較驗類出民手開元斥民退令軍自較運卒皆大服嘗謂理民止當講求農桑水利間有婚姻田土細事一父老片言可決何嘗有大不平須廷鞫者徒爲人魚肉耳遂一意與民休息訟至立決無畱

者每歲終所入贖鍰嘗不及積穀額開元曰吾不自
病民肯爲人病民乎臺司事每下縣多所平反不輕
擬贖雖忤意不恤也烏鎮界浙直之間湖州同知莅
焉嘗以詞訟追捕至吳江民苦之開元具狀白其不
便同知怒訶其褻制開元曰同知卽尊至本轄臺司
止矣諸臺司有所按問竝檄縣處分無徑行者今安
得爾爲文告兩臺兩臺移牒浙省將合疏糾正其害
始戢性明敏知人其所甄拔皆成名士旁邑賢雋聞
風景附大半出其門下不獨吳江一邑也四年選爲

吏科給事中以考成舊案追論謫官久之稍遷光祿
監事行人司副十五年以面劾閣臣周延儒廷杖謫
戍後入閩中累遷隨征東閣大學士言事不合卽乞
身歸入山爲僧所著有魚山疏藁壬癸罪狀年譜諸
書

章日炆

章日炆字敬明德清人少孤育於伯父通政使嘉楨
卽以理學名節相摩切旣舉鄉薦五上不第賃居郡
郭授徒養母足跡罕至公府識與不識皆稱爲真孝

廉云崇禎四年署武進教諭却餽遺絕訴訟其所賞識多知名之士七年舉進士知吳江會當定役富民多飛灑求免按籍率畸零下戶乃矢神爲約閉諸胥一室令盡疏諸大戶實產毋隱既得其實則田多者定役舊額千二百畝卽領北運爲倍增以寬其力而更以南糧恤之有不肖紳受富民賕齟齬其間不聽也收頭一役頗爲民病日烱曰潔已非難除害難耳號設二櫃倣德清式可入不可出櫃置一吏一胥一等一鑼俾納戶自兌投櫃中吏胥僅記其數一有勒

索卽鳴鑼以聞日烱時下堂親驗以杜羨端一縣稱
便上臺善其法下所屬通行京邊轉輸奸吏多上下
其手往往有征無解有批無收大都解有耗放有扣
貪者先放後解罔顧公家之急且解屬之吏動委逝
波不可問於是切置存畱不發擇上供急者先之
有事入郡則身致之以故課額早登爲七邑最時邑
民虞燧上書言水利事下所司日烱卽銳意舉行下
令長橋舊址爲民居旁蝕者期三日內悉撤之又疏
九里塘之淤而水利漸復運塘自劉時俊之後歲久

多圯往來病涉至一夕溺死驛卒十餘人意惻然傷之設席後堂徧延耆老身自勸飲告以不得已之故皆踴躍助役迄用有成他如新學宮廣狴犴百廢具舉又師郡守寇公慎遺法置長卓五百以試士所取前列多相繼得雋者痛抑豪強有盜魁竄入一孝廉家立捕殺之遂爲孝廉所切齒九年夏陳婦事起松江士大夫閼然歸咎王者嗾御史疏糾而邑中不肖紳與孝廉又比而修前隙蜚語流傳日灼一無所辨惟力求去舟次胥江中暍而卒年五十有四其後達

州唐階泰代爲縣嘗痛其誣爲上書訟於兩臺識者
避之階泰字瞿瞿崇禎十年進士爲令亦有聲仕至
禮部員外亂後寓吳江卒

外孫樛章曰余髫髻時侍外大父於官署凡一言一
動未嘗不以古聖賢事相勗也而於官方政體則蒙
昧未能周知後得先考所著行實始心識其大都質
之通國之口亦默相符合也獨是陳婦之獄外大父
以此橫被口語而其原皆因公爲浙人又烏程相君
所取士輒從而排擠之豈知公志節皦然雖出烏程

之門固落落不相合哉陳婦旣以烈名詩謠幾徧吳會而吾邑閭巷之口頗有異辭吳先生允夏有紀實一篇最爲詳覈今附錄之以俟論定云

葉翼雲

葉翼雲字載九同安人崇禎十三年進士知吳江初至歲大旱蝗一以安靜鎮之緩征平糴捐奉設粥又步禱於龍王祠日行數里布袍蔬食以金鼓爲節拜跪甚虔立法驅蝗分道力行未幾蝗皆墜河死是歲雖災不害役有空田議者以國帑詘欲因畝加賦爲備翼雲條其不便所蠲省以六萬計暇則周行城郭相度形勢乃延父老之賢者俾任其役令城外四周皆康衢可通馳馬其上增築臺舍規制宏壯城內巷

各爲門門各有鍵啓閉以時嘗自戎服閱兵郊外夜復率親卒巡行闔閭間謂其民曰吾以安爾寢便爾夙興也十七年夏北都變聞不軌者洵洵思亂翼雲廉得其主名立捕殺之一邑帖然咸服其勇決是年旱疫復作禱益虔不懈尋遷刑部主事乞歸閩中建國擢吏部稽勲司員外明年與紀文疇等起義兵守同安及惠安諸縣同安破被獲不屈死闔門遇害潘子曰余少以文字受知於公公之歸也余餞之舟中時初聞揚州失守相顧欷歔慷慨不能自己余固

知公之殉義決矣後四年果舉兵以死余旣不能執
鞭弭以從公又不能徒步千里效尸鄉之哭尚何言
哉然公在吳爲循吏在閩爲義士雖謂到今不死可
也

林嶠

林嶠字小睂莆田人文筆雋麗崇禎十六年進士明
年知吳江年甚少案無畱事南都政亂罷郡邑童子
試令輸貲徑達學使者嶠捐俸代輸而拔寒畯以應
南都亡江以南諸郡皆不守嶠懷印歸閩閩中立君

以嶠爲工部都水司主事改禮部精膳司遷員外郎
閩事敗遯跡荒江一節自矢故人當路者求一見不
可得居數年莆中有海警嶠與余吏部颺同繫獄有
解之者颺得釋而嶠發憤嘔血死獄中年三十八所
著有螭蜺集多哀郢問天之辭人讀而悲之

潘子曰人臣遇變死者寔矣亡者亦未必非要其歸
何如耳江南瓦解非一邑所能支林公縈身亡去意
欲有所爲卒之不死於官而死於難其死一也見葉
公於九原庶無愧矣

潘子既序次古今長吏論其行事又以爲教化者治民之本而長吏不能獨任故必立師儒之官以董正之其有益於治甚大宋元以前州縣鄉社皆立學爲之師者大抵明經有文行而邑志紀載闕如宋時獨有一楊瑛爲咸淳中教諭行業無聞然余考宋陳溪

有送范竹所赴吳江學職詩又有贈吳江學掾詩今志皆無之則所軼多矣元時見於新舊志者十一人而陳祐則爲震澤學長立沈義甫祠者也考陳造送吳江陳學長詩有云舊學堪重漢儒席新文欲僕楚人騷又云垂虹高士知心客定信襟期出處同推許甚至豈卽祐耶抑別有其人耶謝起東則增立學之兩廊及繪聖賢像者也郭鄧則建靈屋門顧儒寶則立教授題名碑者也盛輿則爲震澤教授以好古博識稱者也其他亦未見有卓然可紀者也明興尤重

教職之選常以得士多寡爲王者殿最菁莪樂育尤爲近古其後掄選不精往往視爲贅員以科貢頽暮者充之表不正而求景端得乎此子衿所以興佻達之刺也今斷自國初擇其一二可爲師表者著於篇

趙鈞

沈轍陶振俱以邑人署縣訓導事見文學傳

趙鈞大梁人吳元年爲訓導文章高古觀三高三忠兩祠碑記可見

瞿莊

邑志失

瞿莊字敬孚常熟人嘗爲吳江訓導有文名擢翰林

典籍與修洪武正韻累官禮部員外郎朱國禎云莊
自典籍遷禮部郎中後至參政

袁時億

袁時億東安人永樂十六年爲教諭有文學

丁侃

丁侃字秉和豐城人宣德二年爲教諭楊少師士奇
作詩送之造士有方尤長於詩古文選寧國教授卒

楊弼

楊弼字之夔廬陵人正統元年爲訓導楊士奇有送

姪子之夔吳江訓導詩

林彤

林彤正統五年訓導莫志云有學善書

陳賓

陳賓字廷用懷安人以儒士爲吳縣訓導正統十三年遷吳江教諭訓士甚嚴累科得人多其高第又以廟學隘陋謀之邑令市地於民鳩材庀工作禮殿兩廡靈星門及講堂齋舍燕寢庖庫無不具備

劉文輝

劉文輝新昌人景泰五年爲訓導端謹善教遷伊府紀善卒

陳用貞

陳用貞字善成東莞人天順二年訓導爲人真率和易長於詩文有琴趣集遷長樂教諭致仕

梁矩

梁矩柘城人弘治中領鄉薦七年署學教諭爲人嚴重廉潔諸生饋遺多却不受至不能自給訓導莆田方文敏有心疾遇長官輒詈辱之手搏生徒以爲常

獨見矩端坐不言愛敬有加或私鉤取於人惟恐其知也未幾被召

徐志云正德初被召乃本表弘治八年已有高志來代安得畱至正德初

即再考之

臨行邑中老幼奔送曰安得假公爲吾父母乎

仕終臨洮知府

王維孝

王維孝字希舜貴州人嘉靖中以貢士

一云鄉薦

來署教

諭爲人壯直廉潔人不敢犯惓惓以成就人才爲務不營私橐諸生貧者必捐奉賑之擢知富陽縣後終

監察御史

蔣弘憲

蔣弘憲宜興人萬曆三十一年以鄉薦署教諭申學
規立社約又置田爲月課餼犒之資而教化大行有
中官將與令爲難弘憲遲其將至集諸生逐之每朔
望長吏至登堂考藝尉以下皆屏齋舍中不敢越級
而上其風裁如此

解學臯

解學臯興化人崇禎八年以貢士爲訓導寬厚端潔
人有求者多不忍却他日負之亦終不較也嘗言士

重立心學業顯晦皆從此出人以為薦論

陳國器

陳國器字玉汝武進人領鄉薦崇禎十年署教諭謹
交遊絕訴訟黷舍蕭然而讀書夜分不倦人服其操